

KOLOSI

Pol Kolosi Binib Kilop Mij Tikak

¹ Yad Pol. God niñid yip aglek, bi Klays Jisas takaw nop dad ameb ak midebin. Pen miñil mam chin Timoti ayip midil, ² nibop mij tikobul. Nibi Kolosi binib God yil midil, mam ay Klays Jisas nop gos liniñid chig tep gil midebim okok, nibop mij tikobul. Bapi God chin ak, ne nibop yimug niñid gitep gek midtep ginimib.

Pol ne Kolosi binib okok kilop gos nigilig God nop agnigup

³⁻⁴ Pen takaw oginap agel chil nopul, nibi Klays Jisas nop gos liniñid, binib God yil midebal okok midupsek kilop mapen lipim. Nopul anib ak, pel nibop nen God nop agnigilig, tep agilig midobul. God, ne Biawl chin Jisas Klays Nap ak mideb. ⁵ Chil nopul, takaw teplep niñid yibil ak, ned ñin ak nibop okok amek dipek. Amek dipek ak nim, God tap teplep ne ak man ne alaŋ di midil chinop ñinigab agil, nigtep gil gos sek kod midebim. Anib ak tek, nibi Klays Jisas nop gos liniñid, binib God yil midebal okok midupsek kilop mapen lipim. ⁶ Pen takaw teplep anib ak, man okok midupsek kid kid ameb. Amnakniñ, binib kuñay niñid kidek gil, gitep yibil gel ameb. Pen nibi abe, gitep gep anib ak nab nibi okok mideb. Ned takaw teplep ak nepek ñin ak tikil, God nibop yimug niñid gitep gek

1:1 Epe 1.1 **1:2** Lom 1.7 **1:3-4** Epe 1.15-16, Plp 1.3, Plm 5, Hib 6.10 **1:5** 2 Ti 4.8, 1 Pi 1.4 **1:6** Mak 4.8, 16.15, Jon 15.16, Epe 3.2, 1 Pi 5.12

ninid nigtep gipek. Takaw teplep anib ak nibop gek amek amek miñil apek, gitep gep anib ak nab nibi okok mideb. ⁷ Bi mapen chin Eaplas, ne Klays bi wog giñeb tep ne olap, nibop takaw teplep anib ak agñek nepek. Ne wog chil gipul tek gilig, chin ayip Klays bi wog giñeb okok midobun. Pen nibop nen wog gitep yibil geb. ⁸ Ne awl apil chilop agñek nopol, God Kawnan ne ak nibop gakniñ God binib ne okok kilop mapen lipim.

Pol God nop agup, Kilop gos tep ñe kiles gil yenigel agup

⁹⁻¹⁰ Ned chil nopol, tap teplep oginap gipek. Anib ak tek, ñin anib ak tikil gi dad apil miñil owup, chil nibop nen God nop pel agnopol. Pen anigil agnopol, God Kawnan ak nibop gos tep yibil ñinimuj. Ñek, nibi binib gos nigep sek midil gos nigtep ginigabim. Gos nigtep gil, God chinop nigek nop tep gonimuj anib nep ginigun agil, gos nigtep ginigabim. Pen nop agnopol, Nibop gos tep anib ak ñek, God gitep gep ne ak nigtep ginigabim. Nigtep gil nim, Biawl anop tep ginigab adek ak gem amnigab. Pen wog keke gitep gem amnigab. ¹¹⁻¹² Pen abe nop agnopol, ne kiles timel yibil ne ak dil nibop ñek, kiles gil jak yenigabim. Jak midil, miñel oginap apek gos anib ak ma ninid, wog ne malik gil giñinigabim. Ne nibop gek gitep yibil ginimib tek lup ak nim, binib ne okok tap teplep ne kilop aglil ñinigab ak dinigabim. Chinop dek binib ne midil milek ne nab ayan midobun agil, gos sek midil Bapi

1:7 Kol 4.12, Plm 23 **1:9-10** Jon 15.16, Lom 12.2, 1 Ko 1.5, Epe 1.8-9, 1.15-17, 2.10, 4.1, 5.10, 5.17, Plp 1.9, 1.27, 1 Te 4.1, Hib 13.21
1:11-12 Epe 1.11, 1.18-19, 3.16, 4.2

nop tep agilig yenimib. ¹³ Kisiim bad ak kiles ak, chinop tunig wos yibil goligup ak pen, God chinop tig asik dup. Tig asik dil agek, Ñi mapen ne ak chin binib ne midon, ne Biawl chin midil chinop kod mideb. ¹⁴ Ne nokom nim, chinop nen kumak tek, God ne chinop pisnep dek kim amon, tap si tap timel gipun okok tig walig giyokup.

Klays ne Biawl yibil midil wog kiles gup

¹⁵ God nop misen niginigun tek ma lup ak pen, Klays nim God mideb tek mideb. Klays pen ne oklan mideb ak nim, binib tap okok midupsek God ne gilak ak, Klays muk ne okok mideb. ¹⁶ Pen God gek Klays ne tap okok midupsek gilak. Tap adekab alan okok lum awl okok, tap widin nopun okok widin ma nopun okok gilak. Ensel okok midupsek, tap kiles adekab okok midupsek, biawl lum awl okok midupsek, bi kiles okok midupsek, anib okok midupsek kilop gilak. God gek Klays ne tap okok midupsek gilak anib ak, anib okok midupsek tap ne mideb. ¹⁷ Man ma alwol gilak ñin ak, ne yek. Pen binib tap okok midupsek ne ayip jimnil midil, gitep gil midtep gipal. ¹⁸ Ne binib ne okok kimig won tek mideb, binib ne okok kili wak ñin kid tob kid ne okok tek midebal. Ne ned jij gil, gek binib ne pel midebal. Pen ne bi ned ak jij gil kumil tepayan tikjakak ak nim, ne Biawl yibil oklan midil, tap okok midupsek muk ne okok mideb. ¹⁹ God gos ne

1:13 Luk 22.53, Epe 2.2, 1 Te 2.12, 2 Pi 1.11 **1:14** Epe 1.6-7

1:15 Jon 1.18, 2 Ko 4.4, Hib 1.3 **1:16** Jon 1.3, 1.10, Lom 8.38, 11.36, Hib 1.2, 2.10, 1 Pi 3.22 **1:17** Jon 1.1-3, 8.58, 17.5, 1 Ko 8.6

1:18 Apo 26.23, 1 Ko 15.20, 15.23, Epe 1.10, 1.22-23, Lep 1.5 **1:19** Jon 1.16, 3.34, Kol 2.9

ke niñid gek, gos ne ak sek, konjim mideb bad ak sek, kiles ne ak sek, anib okok midupsek Klays nab ne ayan midil, ne nim God yek tek yek. ²⁰ Pen God gos ne anigil yek, binib akan, tap tay adekab alan lum awl mideb okok, yad ayip jimñinimun tek lup. Anib ak tek ne agek, Klays mab bak alan kumek nikim sogek, kili God ayip penpen gipal ak keligel, kilop God ayip di jimñil lak.

²¹ Nibi ned tap si tap timel geligipim. Anib ak tek God nop pal awl okok tek midil, nop milik niñid penpen geligipim. ²² Miñil pen Klays kumak tek, God nibop dil ne ayip jimñil yenimib tek lup. Binib ne midebim, God nibop nige takaw olap ma mideb. Binib suntep ne okok teplep yibil midebim. ²³ Pen nibi kal meg awl nab ayan punilel kiles mideb tek, Klays nop gos liniñid, jak midil, kiles gil yenimib. Takaw teplep ak ned nepek. Pen miñil nibi takaw teplep anib ak niñid, tap teplep dinigabun agil, gos niñid kod midebim. Gos pal lil ma ju dinimib, Klays nop gos kiles gil niginimib. Yad Pol, bi wog giñeb ak midil takaw teplep anib ak agñebin. Pen takaw anib ak binib man okok midupsek kilop agñobun.

Pol ne Kolosi binib Klays yilyelak okok kilop wog giñub

²⁴ Yad nibop nen wog anib ak gen, yip gi timel gel yul dipin ak, takaw ma mideb. Klays binib ne dinig, yul awl yibil ak dak. Yul awl dak ak pen, ma

1:20 Lom 5.1, 2 Ko 5.18, Epe 1.7, 1.10, 2.13, 2.16, 1 Jo 2.2 **1:21** Lom 5.10, Epe 2.12, 4.18, Tat 1.15-16 **1:22** Epe 2.14-16, 5.27, 1 Te 4.7, Tat 2.14 **1:23** Mak 16.15, Epe 3.17, 1 Ti 3.16, Hib 3.14 **1:24** Lom 5.3, 2 Ko 1.5-6, Epe 1.23, 3.13, Plp 3.10, 2 Ti 1.8

kul gak. Yul yad dıpin ak, Klays anıb ak tek yad yul dıpin. Anıb ak tek, yad Klays binıb ne giñin agıl, yul dıpin. Klays binıb ne okok, kılı wak ñin kid tob kid ne okok tek midebal. Anıb ak yad miñmiñ gił wog anıb ak gıpin. ²⁵ God ne nokom yıp agek, binıb Klays yıl midebal okok kilop wog giñinim. Anıb ak nıbop ditep ginig God takaw ne ak midupsek agñi tep gıpin. ²⁶ Takaw anıb ak bilel okok nıb we gił, binıb okok midupsek ma nigeligıpal. Miñil pen binıb ne midebal okok kilop misen agyikek nepal. ²⁷ God gos ne ke niñid, binıb ne midebal okok kilop gos ñek, takaw tep yıbil we gił yolıgup ak nepal. Anıgil nepal, takaw anıb ak binıb Juda mel okok kilop gek midtep ginıgabal. Pen takaw we gep anıb ak anıgil mideb, Klays ne nab nıbi okok midek nıbi nepim, ne nıbop dil dad amnıgab God man ne alañ. Dad amek tap teplep ne okok dinıgabım anıb ak tek, nop pel kod midebım. ²⁸ Chin Klays takaw teplep ne ak binıb nokom nokom okok midupsek agñıbun. Pen anıgil gos nopun, binıb nokom nokom Klays nop chıg tep gił gos nigtep ginıgel ak nim, God ñin adek ak linıgun. Anıb ak tek chin gos nigtep gił kilop agñil, takaw kiles agıl agñi tep gıpun. ²⁹ Adek anıb ak nep, God yıp kiles awl ñil kod midakniñ, yad koslam kiles gił wog giłig midebin.

2

Nıbi Klays nop kiles gił gos linıñid, takaw yepıs

1:25 Epe 3.2, 3.7-8 **1:26** Lom 16.25-26, 1 Ko 2.7, Epe 3.3-5, 3.9-10, 2 Ti 1.10 **1:27** Lom 9.23, 2 Ko 2.14, Epe 1.18, 3.8, 1 Ti 1.1 **1:28** Epe 4.13, 5.27 **1:29** Apo 20.20, 20.27, Epe 3.7, 3.20, Plp 4.13

ma dinimib

¹ Yad nibi takaw anib ak nigim agil, anib agebin, nibop okok sek, taun Layodisiya binib Klays yil midebal okok sek, binib Klays yil midebal jomulik yip ma nepal okok sek, nibop nen wog koslam kiles gil gipin. ² Nibi midupsek gos sek midil, penpen mapen lil jimnil yenimib agil, nibop nen wog kiles gipin. Anigem, gos tep ninid nigtep ginimib ak nim, God gos ne we gil yoligup ak nigtep yibil ginigabim. Pen gos ne we gil yoligup anib ak nim, Klays nop ak nep. ³ Klays gos timud teplep ak ne ayip we gil mideb. Ne nokom chinop gos tep yomek gos nigtep ginigabun. ⁴ Pen binib oginap takaw ñig lilig yepis agel, takaw yepis kili ak niginimib tek lup ak nim, nibop agtep gebin. ⁵ Yad man palawl midebin ak pen, gos yad ak nibop yil amnakniñ, nigilig midebin. Pen nibi Klays nop gos kiles gil linigilig, jimnil midebim ak ninid, yip tep gup.

Nibi Klays ayip jimnil midil, kiles gil jak yenimib

⁶ Nibi Biawl Klays Jisas nop nig dipim, anib ak nop chig tep gil jimnil yenimib. ⁷ Mab lum ayan jakil kiles gup ak tek, kal meg punilel kal ak wos gup ak tek, nibi Klays nop chig tep gil jimnil yenimib. Takaw teplep ak nibop agnel dipek ak, nibi gos liniginimib. Gos lininid, God nop tep yibil agilig nep yenimib.

⁸ Pen nigtep ginimib. Bi oginap gos kili ak nep nibop takaw yepis agil, takaw yokip yokip

2:2 2 Ko 1.6, Epe 3.4, 3.18, Plp 3.8, Kol 1.26, 3.14 **2:3** Ais 45.3, 1 Ko 1.24, 1.30, Epe 1.8, 3.19 **2:4** Lom 16.18, Epe 4.14, 5.6, Kol 2.8
2:5 1 Ko 5.3, 14.40, 1 Pi 5.9 **2:7** Epe 2.20-22, 3.17, Kol 1.23 **2:8** Gal 4.3, 4.9, Epe 5.6, Kol 2.3, 2.18-20, Hib 13.9

aginigabal ak, takaw anib ak gos nibi ak ma niginimib. Nigenigabim, nibop tunig wos yibil ginigabal. Bi anib okok, kileki tap anib okok takaw agilak ak niñid dipal. Klays takaw niñid yibil ne ak ma niñid dipal.

⁹ Klays ne bi silok lak, ne ke bi yibil yek. Bi yibil yek ak pen, God gos ne ak sek, konim mideb bad ak sek, kiles ne ak sek, anib okok midupsek Klays nab ne ayan midil, ne nim God mideb tek yipid gil yibil mideb. ¹⁰ God ne nibop gek nop chigil, God binib ne yipid gil yibil midebim. Ne nokom nim Biawl yibil mideb. Ensel okok tap kiles adekab okok sek, biawl kiles midebal okok sek, midupsek muk ne okok midebal.

¹¹ Nibi nop dil jimñil midil nim, bi wak tibilikipal tek midil, God binib ne yipid gil midebim. Pen bi wak nibop tibilikel anigil ma midebim, Klays nop chig tep gil, wak tibilikipal tek anigil midebim. Klays ne anigek, gos nibi ke niñid kidek gipim ak tibilikil, keligil konim amebim. ¹² Nibi ñig pakipek ñin ak, Klays nop chigil, Klays ayip kaw migan yek tek yesipim. Pen God ne Klays nop kiles gil gek tikjakak ak niñid, God kiles ne ak gos nepek. Nibi gos anib ak nepek anib ak, ñig pakipek ñin ak, God nibop gek nibi abe tikjakipek. ¹³ Nibi ned tap si tap timel anep gil, gos nibi ke niñid kidek gipim ak tibilikil ma keligipim. Ñin anib ak pisnep kumeb tek yeligipim ak pen, God ne gek Klays ayip midil konim midebim. Tap si tap timel gipun ak

midupsek tig walig giyokil, Klays ayip midil konim midobun. ¹⁴ Takaw Mosis ñu kil tikak ak, takaw kiles tikilak ak sek takaw binib ginigel ma ginigel tikilak ak sek, midupsek wik yokak. Takaw keke tibilikonok, takaw awl mideb ak pen, ne dam mab bak alaŋ Klays ayip chipil pak tibik lek takaw kiles anib ak kul gup. ¹⁵ Anigup tek, kicheki walijpal tap anib okok kiles kili ak ma yek. Klays mab bak alaŋ kumak ak, God binib okok kilop gi yomek nigilak, ne tap anib okok midupsek taw jisipuk gak. Taw jisipuk gil, kilop gek tap yokip tek lil, pisnep apyap pakilak.

Chin Klays kumak tek kumon, tap lum awlyil ak chinop gitep ginimuj tek ma linigab

¹⁶ Anib ak nibi ñig akan tap midup okok ñibem, binib oginap nibop ag sikol ma ginigel. Kili ñin awl titay agil asikinigabal akan, takan kidek owup ñin ak ñin awl agil asikinigabal akan, Juda añin lep ñin awl agil asikinigabal ak, kidek ma gem nibop ag sikol genigel, gos kuŋay ma niginimib. ¹⁷ Tap anib okok, tap kawnan yokip tek mideb, tap niŋid yibil ak kidek ownigab. Klays pen ne tap niŋid yibil mideb. ¹⁸ Bi olap yib ne ke dad aplanil, yad biawl yibil midebin agil, yepis gil aginigab, Day nepin tek, chin ensel muk okok midil, kilop agniginigun agenigab, takaw nop ak ma dinimib. Nibi gem, nibop ma taw jisipuk ginimuj. Ak gos ne ke niŋid kidek gup ak, gos ne ke monmon nigup tek yepis agup. ¹⁹ Bi anib ak, Klays nop chig tep ma gil, nop keligup. Pen Klays, ne kimig won tek ak

mideb, chin wak ñin kid tob kid ne tek midobun. Ne chinop gek, chin nop chigil, bi kidil tek jimñil mubwak nokom midobun. Anigil midon, God chinop gek wog gon amek nim, midtep ginigabun, Klays mubwak ne awl gil kiles ginigab.

²⁰ Nibi Klays ayip kubek tek lup, anib ak tek kicheki tap anib okok kili nibop tunig leligipal nag wos ak, pisnep pugilikop. Anib ak taynen binib lum awl okok gos nepal tek niñid gi midebim? Taynen takaw kiles timel anib okok niñid kidek gebim? Takaw anib ak anigil apal, ²¹ Tap ak ñin ma dinimin, tap ak ma ñinimin, tap ak ma diniginimin apal. ²² Tap anib okok ñibun akan tay gon apal ak, tap yokip tek lil kul gup. Takaw kiles timel agñibal anib ak, binib gos kili ke niñid apal adek ak nep agñibal. ²³ Binib anib okok God nop ma chigipal tek, God nop yepis agnepal. Gos kili ke nepal tek gilig, binib yingep tek midon tep ginigab agil, tap asik mosik gil, koslam midebal. Anigel, binib oginap nigel, niñid gebal tek linigab ak pen, tap timel gep gos ak ownigab. Apek, God ayip ma midebal tek, tap olap kiles ñek, midtep ginigel tek ma mideb.

3

God chinop gek Klays ayip tikjakil konim midobun

¹ Pen nibi Klays ayip tikjakil konim midebim anib ak tek, gos awl nibi ak adek alañ amnimun, Klays ne mideb ak. Ne adek alañ God ñin yipid kid

2:20 Gal 4.3-5, 4.9 **2:21** 1 Ti 4.3 **2:22** Ais 29.13, Mat 15.9

3:1 Sng 110.1, Mak 12.36, 16.19, Epe 1.20, Plp 1.30, Kol 1.29, 2.12, 1 Te 2.2

okok yıl besigil, tap okok midupsek kod mideb. ² Pelpel tap ne mideb adek alan gos niginimib, lum awl tap okok gos ak ma niginimib. ³ Nibi nepim, Klays ayip kubek tek lup ak nim, God ayip jimnil midem, konim midebim jij ak, Klays ayip we gil mideb. ⁴ Anib ak nibi konim midebim jij ak nim, Klays ne nokom. Kidek ne adikid apil misen linigab nin ak, nibi abe milek ne ak dil ne ayip misen linigabim.

Ned yeligipim ak ke, miñil midebim ak ke

⁵ Anib ak tap lum awl yıl ak nab nibi ayan mideb ak, midupsek keliginimib. Tap anib apin ak, binib bin si bi si gil, gos timel ninid kidek gil, midupmidup tikjakek gil, binib oginap tap kilop okok ayip tek yobikop gos ninid, tap chin ke kunay yibil dun agil nepal okok. Binib tap chin ke kunay yibil dun agil nepal okok, kili tap yepis sibog ñibal tek ak gipal. ⁶ Binib tap anib okok gil God takaw tibilikipal okok, ne kilop timel ninid yul awl ninigab. ⁷ Nibi ned binib yokip yeligipim nin ak, tap timel adek anib ak nep gos ninid kidek geligipim.

⁸ Miñil pen tap timel anib okok ma yibil ginimib. Milik ninid, chibol timel gil, gos timel ninid, binib agjuwil milik timel yibil yapil, ñiñlonj lil wasik agil, geligipim tek ma ginimib. ⁹ Pen takaw yepis agil, pen agek pen agek ma aginimib. Nibi nepim,

3:2 Mat 6.33 **3:3** Lom 6.2, 2 Ko 5.7, 5.14, Gal 2.20, Kol 2.20 **3:4** Jon 11.25, 14.6, 1 Ko 15.43, Plp 1.21, 1 Jo 3.2 **3:5** Lom 6.6, 6.11-13, 8.13, Gal 5.24, Epe 4.19, 5.3-5, 1 Te 4.5 **3:6** Epe 5.6 **3:7** Lom 6.19-20, 1 Ko 6.11, Epe 2.2 **3:8** Epe 4.22, 4.25-31, 5.4, Hib 12.1, 1 Pi 2.1 **3:9** Epe 4.22

tap timel anib okok geligipim ak keligil, bi kili chech timel gup ak diyokipal tek diyokipim. ¹⁰ Diyokil, gos tep kideyil adek ak ninid, bi kili chech konim lipal tek lipim. Pen God, ne nibop gilek binib konim midebim ak, ne yad kilop gen yip nigtep yibil ginigabal agil gos nigup. Gos anib ak ninid, ne pel nibop gek ne mideb tek midebim. ¹¹ Chinop anigup tek, miñil tig asik keke ma midobun. Binib Juda mel jij ak ke, Juda binib jij ak ke ma midobun. Binib wak tibilikipal okok ke, binib wak ma tibilikipal okok ke ma midobun. Binib takaw keke okok ke, binib gos ma nepal tek okok ke ma midobun. Binib wog giñeb biawl olap muk okok midebal okok ke, binib wog gep biawl olap muk okok ma midebal okok ke ma midobun. Klays pen ne nokom biawl yibil midil, okok midupsek mideb. Pen binib okok midupsek nab ayan mideb.

Binib okok kilop mapen linimib

¹² God nibop mapen lil aglek, binib suntep ne midebim. Anib ak nibi aniginimib. Binib okok kilop chib ninid gitep gil, yimug niginimib. Binib tam okok tek midil, kabiyam ma juwil, binib sayn tep okok yenimib. Miñel oginap ownigab ak, kimigel jimñil yenimib. Anib okok nibi bi kili chech konim lipal tek ak linimib. ¹³ Pen nab nibi okok, bi oginap kili bi oginap sek kilop gi timel genigel takaw oginap yonimuj, penpen ditep gilig yenimib. Biawl tap si tap timel gipim ak tig walig

3:10 Stt 1.26, Lom 12.2, Epe 2.10, 4.24 **3:11** Lom 10.12, Gal 3.28, Epe 1.23 **3:12** Gal 5.22, Epe 4.32, Plp 2.1, 1 Pi 2.9 **3:12** Epe 4.2
3:13 Mak 11.25, Epe 4.32, 5.2

giyokup tek, pen niñid keligek pen niñid keligek ginimib. ¹⁴ Pen tap awl yibil ak, binib mapen linimib. Nibi mapen lem nim, mapen lep anib ak nibop gek jimñil midtep gil kiles gem amnimuñ. ¹⁵ Klays nibop aglek, nibi kimigel midtep gil, ayip jimñil midil mubwak nokom tek yenimib. Kimigel midtep gipek anib ak, nab nibi okok kod midek gos telep niginigabim. Pen God nop tep agilig yenimib. ¹⁶ Klays takaw ne ak nab nibop ayan aplan jakil tek yonimuj. Midek, gos nigtep gil penpen agñil, takaw kiles agil agñi tep ginimib. Pen nibi kimep aginig, gos nibi nab ayan God nop nigilig tep aginimib. Buk Kimep takaw okok penpen agñilig, kimep Klays yib nop dad aplanub okok agilig, kimep God Kawnan ne ak nibop gos ñek okok agilig ginimib. ¹⁷ Pen takaw aginig akan, titay ginig, Biawl Jisas ayip midobun agil, anib okok midupsek gem amnimuñ. Pen Jisas nop gos niñid, Bapi God nop tep agilig yenimib.

Bi bel okok, nonim nap ñapay okok takaw agup ak

¹⁸ Nibi bin okok, nigimil sikop muk okok yenimib. Biawl nop chig tep gipim anib ak tek, aniginimib. ¹⁹ Nibi bi okok, bin nibi okok kilop gi timel gil takaw kiles gil ma aginimib. Kilop mapen linimib.

²⁰ Nibi ñapay okok, nanim nap sikop aginigel tek midupsek nig dinimib. Anigenigabim, Biawl chin

3:14 Lom 13.8-10, 1 Ko 13.13, Epe 4.3 **3:15** 1 Ko 12.13, 12.27, Epe 2.16-17, 4.4, Plp 4.7 **3:16** 1 Ko 14.26, Epe 5.19, Kol 4.6 **3:16** Epe 5.19-20 **3:17** 1 Ko 10.31, Epe 5.20, 1 Te 5.18, Hib 13.15 **3:18** Epe 5.22, Tat 2.5, 1 Pi 3.1 **3:19** Epe 4.31, 5.25, 5.28, 1 Pi 3.7 **3:20** Epe 5.24, 6.1, Tat 2.9

anop tep ginigab. ²¹ Nibi nap sikop, ñapay nibi okok kilop takaw yilik ma aginimib. Anigem yilik gek, gos timel niñid midtep ma ginigel tek lup.

Biawl okok sek binib wog giñeb kili okok sek takaw agup ak

²² Pen nibi binib wog giñeb okok, biawl nibi okok takaw kili ak midupsek nig dil kidek ginimib. Kili nig yelakniñ, won anib ak nep wog gitep gon kilop tep gan agil, anib ma ginimib. Biawl Klays nop pilikil, biawl nibi okok kilop yepis gil wog yokip ma ginimib, wog kiles gil gitep yibil gun agil gos niginimib. ²³⁻²⁴ Nibi Biawl Klays nop wog gitep genigabim, nibop pen tap telep ñil ditep ginigab. Tap telep anib okok, binib ne okok kilop ñinigab agil aglak. Anib ak tek tap titay ginimib okok, midupsek wog kiles gil ginimib. Bi okok kilop nep wog gobun agil ma niginimib. Biawl alañ anop wog gobun agil wog ginimib. Wog giñebim ak, Biawl Klays nop giñebim. ²⁵ Pen bi an gi timel ginigab ak, God ne bi anib anop pen gi timel gil yul ñinigab. Pen ne binib yib mideb akan ma mideb, anigil gos ma nigup. Adip adip midebal ak niñid, pis olap akan pis olap ma amnigab.

4

¹ Nibi biawl midebim okok gos niginimib, Biawl nibi ak abe mideb, man ne alañ. Anib ak tek bi wog giñeb nibi okok kilop kod midtep gil, tap kilop ñeb tek ak gitep gil ñinimib.

3:21 Epe 6.4 **3:22** 1 Ti 6.1, Tat 2.9 **3:22** Epe 6.5-8 **3:23-24**
 1 Ko 7.22 **3:25** Lo 10.17, Lom 2.11, Epe 6.9, 1 Pi 1.17 **4:1** Wkp
 25.43, 25.53, Epe 6.9

God nop agnigilig aj tep ginimib

² Nibi God ayip agilig nep yenimib. Pelpel gos nigtep gil midilig, God ayip agil, nop tep agilig yenimib. ³ Pen chinop abe gos nigilig God nop agnigem, ne kanib chinop yikek, Klays takaw ne ak agñinigun. Takaw anib ak bilel we gil yoligup ak, yad agñen yip nag lelak midebin. ⁴ Pen nop agnigem, yip kod midakniñ, yad takaw anib ak gos nigtep gil, agtep gil misen agyiken, binib nigtep ginigel.

⁵ Pen nibi gos nigtep gil, binib Klays yil ma midebal okok kilop ditep ginimib. Ñin akal takaw tep ak kilop agñinig, agñinimib. ⁶ Takaw ak aginig, pelpel meg migan nibi ak dek yidek tek lonimuñ, kili takaw anib ak nigun agil gos niginigel. Pen nibop takaw tay tek agnigenigabal, gos nigtep gil kilop nokom nokom pen agñi tep yibil ginimib.

Pol ne Tikikus ayip Onesimus ayip kilop agyokak

⁷⁻⁸ Bi Tikikus mam tep chin ak, ne bi wog gitep gup ak midil, chin ayip Klays bi wog giñeb ne midobun. Yad nop agyoken nibop apeb. Chin titay dil tek midobun ak nibi niginimib agil, nop agyokipin. Anib ak agyoken amil, yad tay gipin ak midupsek nibop agek niñid, gos sek yenimib. ⁹ Pen mam tep chin ak Onesimus ne wog gitep gilig mideb ak, ne bi Tikikus ayip amebil. Onesimus ne bi nibi ke olap mideb. Pen tap titay okok geb awl ak midupsek, bi omiñal amil nibop agñi tep ginigayl.

4:2 Epe 6.18, Plp 4.6 **4:3** Lom 15.30, 1 Ko 16.9, Epe 6.19 **4:4** Epe 6.20 **4:5** Epe 5.15-16, 1 Te 4.11-12 **4:6** Mak 9.50, Epe 4.29, Kol 3.16, 1 Pi 3.15 **4:7-8** Apo 20.4, 2 Ti 4.12 **4:7-8** Epe 6.21-22
4:9 Plm 10-12

Takaw day won oginap

¹⁰ Bi Alistakus, nop nag lilak ak yad ayip midobul awl, ne nibop ag dideg leb. Bi Mak, ne Banabas ñibem ak, ne abe nibop ag dideg leb. Bi Mak anib ak ned takaw agyokil aginek, Ne nibop apjakenigab, nop dil ditep ginimib aginek. ¹¹ Pen bi chin Jisas, yib nop olap Justus apal ak, nibop ag dideg leb. Bi ominal nokom anib okok, kili nep Juda bi okok yad ayip wog jimnil gobun. Kili yad ayip wog gil, God binib dil kilop kod yenigab wog ak gitep gebal. Wog gitep anib ak nigen yip tep gup.

¹² Bi nibi Eaplas, ne bi Klays Jisas nop wog giñeb ne mideb ak, nibop ag dideg leb. Ne minek minek nibop gos niñid, God nop agniñid agup, Nad kilop gek, kili gos oginap ma niñid, jak tep gil yenigel agup. Nep chig tep gil gos nigtep gil, apan tek midupsek niñid kidek gel amnimun agup. ¹³ Yad Eaplas nop niñid, niñid yibil agebin, ne kiles gil nibop wog gil, taun Layodisiya binib kilop wog gil, taun Hiyelapolis binib kilop wog gil gup. ¹⁴ Pen bi mapen Luk, ne dokta olap, nibop ag dideg leb. Bi Demas abe, nibop ag dideg leb.

¹⁵ Taun Layodisiya binib Klays yil midebal okok kilop aginimib, Pol ne nibop ag dideg leb aginimib. Bin olap yib ne Nimpa ayip, Klays binib ne kili Nimpa kal ak pelpel apnan gipal okok, kilop aginimib, Pol ne nibop ag dideg leb aginimib. ¹⁶ Nibop mij tikebin awl, mij pi ak nigilig agnil niginimib. Niñid, ñem amek, taun Layodisiya binib Klays yil midebal okok abe niginigel. Pen taun

Layodisiya binib kilop mij tikebin ak, nibi abe dil niginimib. ¹⁷ Pen bi Alkipus nop aginimib, Biawl ne wog nep agak ak, gitep yibil gil gijunimin aginimib.

¹⁸ Mij awl takaw kidek won ak, yad ke tikil nibop ag dideg lebin. Yip dil nag lel midebin ak, gos niñid sawl ma ginimib. God nibop yimug niñid gitep ginimuj.

Jisas Klays Takaw Teplep Ne Tay New Testament

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files dated 29 Jan 2022

24d09cce-9a93-523a-afa5-7b091c264cee